



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 12. Kalenderwoche – ab 22. März 2009

Im Januar dieses Jahres erlangte die Stadt Limbach-Oberfrohna weltweite „Berühmtheit“, als ein 23-jähriger Autofahrer mit seinem PKW nach einem nächtlichen 35-Meter-Flug im Kirchendach landete.

Sozusagen ein „Iborflieschor“, der allerdings nichts mit dem „Überflieger“ an der Chemnitzer Neefestraße zu tun hat. Dieser Überflieger ist und bleibt nach wie vor ein städtisches Sorgenkind des Verkehr(t)swegebaut.

# Iborflieschor

Nee, isch will jedze nisch vom Iborflieschor an dor Neefeschdraße reedn... daderzu duds ja keene neun Erkenntnisse gähm - aus meinor Sischn is dähr dord eenfach klasse. Un was dähr gekosded had... herrje, währ dud denn schon so genau offs Geld guggn? E baar Milljöhnschn! Was sinn e baar Milljöhnschn im Zeidaldor eenor Griese, wos bloß noch um Milljardschn gehn dud!

Nee, isch wolde nochma off dähn annorn Iborflieschor zu schbreschn komm - dähn aus Limbach-Oberfrohna. Sie wissn wähn isch meene? Genau - der junge Kerl, dähr mid seim Audo im Kerschndach gelandet is!

Hamm Sie sich abor schon ma die Schdelle vor Ord angeguggd? In Limbach an dähr Greizung beim Radhaus? Nee? Das missn Se unbedingt ma machn. Wenn du dir das anguggn duds - du kannsd es eischendlich nisch gloom. Das is wie so eene Schdorry vom Minschhausn, dähr off eenor Kanonenkuchl geflochn is. Du kannsd das eenfach nisch gloom! Das is sowas von unglöoblich! Ohm in dor Kirsche siehdsde abor dähn Landebladz - un du siehds ooch dähn kleen Abschbrunghieschl un das Geländor, wo dähr durschgebreddord is... - ja, dähr Kerl is werglich mid seim Audo off de Kersche noff gehubbd! De Schburen sinn eindeudisch.

Endwedor dähr war voll von Redd-Bull - odor dähr muss een Affnzahn droff gehabbd hamm. Nach alle Reeschln dor Ballisdigg däde isch ma sachn - dähr hadde mindesdens hunnordachzisch droff. Unnor dähm kann dähr niemals dord noff gehubbd sein. Da wär dähr undn geschn de Mauor gegnalld - un Ende dor Durschsache! Abor dursch dähn freien Fluch noff offs Dach, da had sisich de Energie endladn un offgebrauchd. Dähr Kerl had dann mid seim Audo dord ohm im Dach fasd eene weische Landung hingeleschd. Nee, da kann ooch mansch eenor anfang, an dähn liehm Godd zu gloom. Dass dähr seine reddenden Hände im Schbiel gehabbd hamm kennde. Abor wennis nisch dor liebe Godd gewähns is, dann musses doch irschend e annorsch iborirdisches Wähns gewähns sein - e Schudzengl odor sowas! Ja, es is ledzdlisch e eschdes Wundor, was da bassierd is!

Isch däde sachn, e noch viel greeßores Wundor, als wie zum Beischbiel das Wundor, was in Frankreisch bassierd is - in Lohurdes odor wie das geschriem wird. Dord is ma irschendwähm irschend eene Heilische erschienen! Geeschn Limbach e gladdor Bubs! In Limbach muss nisch nur eene Heilische erschienen sein, die muss rischdisch aggdief eingegriffn hamm!

Nee, de Limbachor hamm jedzde werglisch die große Schangse, e Wallfahrdsord zu wern. De Billschor aus alle Herrn Ländor dädn komm un zahln un schdaunen! Die Limbachor missdn ehm bloß dord bei dähr Kersche eene kleene Aussischdsbladdform hinbaun... un die derfdn nadiehrlich das Loch im Kerschndach nisch rebariern! Das missde offn bleim - wie eene offene Wunde, die vom Wundor zeuschn dud. Dann missdn se noch e kleenes Kassnhäusl hinschdeln un wardn, bisse reisch sinn! Odor wenn Redd-Bull off die Idee komm däde, das Wundor zu vormargdn...?

**Eduard Sachsenmeyer**